

أنا إنسان

ليه باصصلى ومستغرب
وشايف لوني مش لونك
والله نظرتك ... اغرب
مع إن القرنيه واحده
فى عيونى وف عيونك
ولو على لون الصبغه فى جدى
فلونها ياناس مش بايدى
حكمه وقالهالى زمان جدى
مقولش لبشر فى يوم سيدى
طب احكم بنفسك وإعترف
لو لون دمك كان مُختلف
طب اقطع وريدك ووريدى
ليه تبنى مبدأ للتصنيف
وهدومى تكون شهاده تعريف
خليت وصفى بزى انا لابسه
والتفرقة مفروضه عليا
وإحساس قهر علطول حاسه
ولو فكرت أرفض واصرخ
صوتى بسطوه بتكون حابسه

مش بطلب منك إحسان
بس ليه أحس إن أنا متهان
أنا بطلب مُعامله آدميه
حتى إكتبوه بند ف إتفاقية
بند يفيد إن أنا إنسان
بند يقول إننا سواسية
مش ده فقير و ده أعيان
بند للعدل مع شفافية
ما هو الحق أبيض مش ألوان
ليه بنتمنى مكانة دولية
وإحنا ما بينا الف وسية
سيد ف العالي و عبد مُهان
والغلبان فيها ضحية
والموت يكون له بالمجان
وحقه يضيع و مش قضية
عشان ع الهامش شقيان
ووالله ما أحقاد طبقية
دي شهادة برفعها للرحمن
و بقولهاك عاليه قوية
مفيش حرية بدون آدمية
ولا فى فكر يحبسه سجان
مفيش حرية بدون آدمية
ولا فى فكر يحبسه سجان